

600 siswa NUS ikuti modul pekerjaan

SEKITAR 600 siswa Universiti Nasional Singapura (NUS) kini mengikuti modul baru berkaitan persiapan kerja yang diperkenalkan bulan ini.

Modul itu sebahagian usaha melengkapi siswa dengan kemahiran bagi pasaran pekerjaan.

Menurut akhbar *The Straits Times*, modul 12 minggu itu memberi tumpuan pada perancangan kerjaya. Siswa boleh mengikutinya semasa tahun kedua atau ketiga.

Antara lain, modul tersebut bertujuan membimbing pelajar memilih dan menentukan perjalanan kerjaya serta melengkapi mereka dengan kemahiran memasarkan diri.

Modul yang dinamakan *Career Catalyst* itu lanjutan program asas 10 minggu berjudul *Roots and Wings*, yang diperkenalkan pada 2016.

Roots and Wings melengkapi siswa tahun pertama dengan kemahiran hidup seperti kesedaran terhadap perasaan diri dan gaya perhubungan.

Provos dan Timbalan Presiden Kanan NUS, Profesor Ho Teck Hua, mengumumkan daya usaha tersebut dalam pembukaan pesta kerjaya NUS *Career Fest* semalam.

“Program ini akan membantu pelajar memulakan perancangan kerjaya. Masa depan pekerjaan di Singapura dan dunia pesat berubah.

“Justeru, pelajar kami perlu tangkas menyesuaikan diri kepada sekitaran kian berubah,” katanya.

Antara yang kini mengikuti program *Career Catalyst* semester ini ialah pelajar tahun ketiga jurusan seni bina, Encik Ryan Leong, 24 tahun.

Beliau belajar bagaimana menghasilkan imej profesional, menulis resume dan membina profil laman rangkaian sosial bagi karyawan LinkedIn yang dapat menarik perhatian majikan.

“Kami juga mempelajari lebih banyak tentang personaliti, yang membantu kami mencari pekerjaan sesuai,” kata Encik Leong.

Career Fest, pameran kerjaya terbesar anjuran NUS sejauh ini, memaparkan lebih 260 majikan daripada 21 industri, termasuk khidmat kewangan, runcit, pelayanan dan kejuruteraan. Sekitar 4,000 peluang pekerjaan ditawarkan.

Selain menjadi wadah siswa dan majikan berinteraksi selama dua hari, acara itu memberi tumpuan pada pembangunan diri dan penerokaan kerjaya.

Misalnya, pengunjung boleh menyuri kisah peribadi karyawan dan pengajaran yang diraih daripada kerjaya yang diceburi.